

NO. SOALAN : 26

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB. DATO' HASAN BIN ARIFIN  
[ ROMPIN ]**

**TARIKH : 26 MEI 2016**

**SOALAN :**

**YB. Dato' Hasan bin Arifin [ Rompin ] minta MENTERI PELANCONGAN DAN KEBUDAYAAN menyatakan apakah yang telah dilakukan oleh Jabatan Warisan bagi melindungi warisan negara serta apakah akta sedia ada mencukupi bagi melindungi warisan negara daripada hanyut oleh arus pemodenan seperti mana yang berlaku kepada Penjara Pudu.**

**JAWAPAN : DATO' SERI MOHAMED NAZRI BIN ABDUL AZIZ**  
**MENTERI PELANCONGAN DAN KEBUDAYAAN**

Tuan Yang di-Pertua,

Kementerian Pelancongan dan Kebudayaan melalui Jabatan Warisan Negara telah mengambil segala usaha untuk memulihara, memelihara dan melindungi warisan negara mengikut Akta Warisan Kebangsaan 2005 [Akta 645]. Akta 645 ini merupakan satu skop perundangan yang komprehensif merangkumi peruntukan bagi pemuliharaan dan pemeliharaan Warisan Kebangsaan, Warisan Semulajadi, Warisan Kebudayaan Ketara dan Tidak Ketara, Warisan Kebudayaan di bawah Air, Harta Karun dan bagi perkara-perkara lain yang berkaitan. Antara usaha yang telah dilaksanakan adalah seperti berikut:

- (i) mewartakan di bawah Akta Warisan Kebangsaan 2005 (Akta 645) seperti Bangunan Sultan Abdul Samad, Masjid Ubudiah dan lain-lain;
- (ii) menyediakan Pelan Pengurusan Pemeliharaan seperti Pelan Pengurusan Pemeliharaan Warisan Dunia Arkeologi Lembah Lenggong dan Pelan Pengurusan Pemeliharaan Tapak Warisan Dunia Melaka dan George Town;
- (iii) melaksanakan kerja-kerja konservasi bangunan dan tapak seperti Rumah Penghulu Mat Natar, Bangunan HSBC Melaka dan lain-lain;
- (iv) mengangkat warisan yang memenuhi kriteria untuk pengiktirafan antarabangsa terutama sekali di bawah UNESCO seperti Tapak Warisan Dunia Lembah Lenggong dan Bandar Warisan Dunia Melaka dan George Town; dan
- (v) melaksanakan program kesedaran kepada masyarakat umum seperti Jejak Warisan dan Semarak Warisan.

Pada masa ini, Akta 645 yang berkuatkuasa pada 1 Mac 2006 masih bersesuaian bagi melindungi khazanah yang bekepentingan warisan di Malaysia. Namun begitu, pindaan terhadap akta ini sedang dijalankan bagi menambahbaik peruntukan yang terdapat di dalamnya untuk tujuan pemuliharaan, pemeliharaan dan perlindungan khazanah warisan negara. Penambahbaikan akta ini akan terus dijalankan dari semasa ke semasa supaya ia terus relevan dalam memartabatkan warisan negara.

Sekian, terima kasih.